

KLASS B
KA KOT PULE
KHASI

Da
I Miss WISSIBON DIENGDOH,
Nongsawlia, Cherrapunji.


*Approved as Text Book for Khasi
Vernacular by the Government.*

Published by :—
THE KHASI JAINTIA PRESBYTERIAN SYNOD,
K. J. Presbyterian Synod Church House,
MAWKHAR, SHILLONG.

1978

KLASS B **KA KOT PULE** **KHASI**

REFERENCE
Not to be Lent out



*Approved as Text Book for Khasi Vernacular
by the Government.*

Published by :—
THE KHASI JAINTIA PRESBYTERIAN SYNOD,
K. J. Presbyterian Synod Church House,
MAWKHAN, SHILLONG.

1978

La shon ha K. J. Presbyterian Press, Shillong bad ia
ka jingsop la shon ha Don Bosco Press, Shillong.

Library books will give you Joy for Long
If handled carefully with clean hands

KA KOT NYNGKONG

KLASS "B"

SHIKYNTIEN ARKYNTIEN

REFERENCE
Not to be Lend out

Kane ka Kot Pule Nyngkong Klass "B" ka long ka kyrdan kaba la kham sngewtynnad shirukom ia ki khynnah bad ha ki nonghikai.

Ka daw ka long namar ki khynnah ha kane ka klass ki la ithuh ia ki dak, bad ki la nang ruh ban pule. Ki la kham nang ruh ban thoh ban ia ki Klass "A". Ki la ioh jingshai katto katne. La katta ruh ka don ka jingialeh shuh shuh ban iaid shaphrang ha kaba ithuh bha ia ki ktien ha ka rukom kaba dei ban pule, haba don ki ktien kiba eh bad bun jingkyinnoh, da kaba sngewthuh de ia ki jingmut ki ktien.

Kiwei pat, donkam shuh shaphang ka rukom thoh ha kaba buh beit, ha kaba pyniasoh, ia ki ktien da ki dak ha ka rukom kaba dei. Kawei pat—kane ka klass "B" ka la dei ban kham pyniar ia ka jabieng u khynnah da kaba spel dak, namar ka jingthoh kan ym beit, lada u khynnah um nang ban spel dak.

Dei ban pyniar ruh da kaba thoh ki sentens kiba rit. Shisien ong, ka klass "B" ka long ka nongrim kaba nyngkong shuwa ban poi sha ki klass kiba shaneng. Ka ktien Khasi kaba bha ka shong eh ha ka jingbuhbeit ia ki ktien haba kren ne thoh, ban spel suh ha ka rukom kaba dei. Kumta la dei ban hikai ha ka rukom kaba dei naduh kaba sdang, kata, nadnh ki klass kiba rit.

Ngi ki nonghikai tongin iapyrshang katba lah.

NONGTHOH,


Library books will give you Joy for Long
If handled carefully with clean hands

KI JINGKDEW

Lynnong	Sla
I. Ka Kot	1
II. Jingpule khleh	2
III. Ka Ri baieit jong nga	3
IV. Jingrwai—Ri Khasi Jaintia	4
V. U Tirot Singh	5
VI. U Tiewdohmaw	9
VII. U Ngap	11
VIII. Jingrwai—Shaphang U Ngap	13
IX. Ka Lama ka Ri India	14
X. U Jawaharlal Nehru	15
XI. Ka Sarojini Naidu	18
XII. Jingrwai—Ka Ri India	21
XIII. Ki Kyrdan sha ka jingnang- Jingstad	22
XIV. Jingrwai—Ki Kyrdan sha ka Jingstad	24
XV. U Phan	25
XVI. Jingpule—Ki Jingriew ba iapher	27
XVII. Ka Sngi	29
XVIII. U Hati	31
XIX. Ka Shatri	34
XX. Jingrwai—Kiei kiei kiba rit	36
XXI. U Dewiong	37
XXII. Ka Eroplaiñ	39
XXIII. Ka Kramaphone	41
XXIV. Ka Kshaid Wah Ren	43
XXV. Jingrwai—Tur Shaphrang	46
XXVI. Kumno ba ka Met kan sting	47

LYNNONG I.

KA KOT.



kiew

ngelt

shaphrang

itynnad

jingrwai

jingiathuh

Ko mei nga la kiew klass.

Nga ngeit phi la kmen eh.

Kane ka kot Pule Klass 'B'.

Peit ki dur kiba itynnad.

Ka don ha ka ki jingiathuh shaphang ki
briew kiba pawnam ha ka ri jong ngi bad na
ka ri India.

Ka don ki jingiathuh ban tip ia ki tiar ki
tar ba ki briew ki la lah ban shna, ha ka jingstad
kaba mynta, ba la pyniaid da ki kor ki bor.

Don ka jingiathuh ia ki jingtrei kiba ai jingmyntoi. bad ia ki jingthung ki jingtep.

Ka don ka jingiathuhkhana ki tymmen hyndai kaba sngewtynnad.

Ka don ki jingrwai kiba sngewthiang ban spel.

Ka don ruh kiei kiei kiba kordor ia ngi ki khynnah skul ba ngin tip, ba ngin nang bad ba ngin roi, katba ngi nang san ha ka rynieng bad ka jingpule.

LYNNONG II.

JINGPULE KHLEH.

dkhoh

phiang

jhieh

khlañ

brlew

thagan

mlien

kpleng

sdien

sylem

prek

dieng

thliew

shriew

pdiang

ktieh

prek



U long u syiem uba khlañ bad khraw bor.
 Ki pdiang um ha u khiew phiang.
 U la ur ha ka um ktieh bad u la jhieh.


U briew u sdien ia u kpieng ha u prek.
 U bam shriew ba u la thngan eh.
 Ka dkhoh ka shong ha thliew jong u dieng.

Pyndap dak ia kine ki ktien :—

thl—w, br—w, ml—n, di—ng, dk—oh,
 pd—ng, sy—m, kp—ng, sh—w, jh—h.

LYNNONG III.

KA RI BA IEIT JONG NGI.



Jaintia	Laiphew sylem	pyngngad
shngiam	tiewlyngskaw	umpohlew

Ka Ri Khasi Jaintia ka long ka ri baieit eh
 jong ngi. La ju khot ka ri ki Laiphew Syiem
 bad ka ri Khadar Doloi, namar la synshar ja ka
 da ki Syiem bad ki Doloi.

Ka don ki lum kiba jrong bad kiba pynggad. Ka don ki wahbah bad ki kshaid kiba ithiang, ha la ki jong ki jong ki kyrteng. Ki don ki riat kiba jrong kiba itynnad ban peit.

Ki don ki lawbah lawsan, ki diengbah diengsan bad bun jait ki tiewdieng halor jong ki.

Don bun jait ki tiewdieng—u tiewmationg, u tiewlyngskaw, u tiewkhmut sher, u tiewklong lieh klong iong bad kiwei kiwei de.

Ka lyer ruh ka long kaba iwbihi bad kaba khuid ban ring mynsiem. Ki don ki umpohliw kiba shngiam ban dih.

Ha kane ka ri jong ngi ki la mih ruh ki riewshlur, kiba la khot ki khlawait.

Jingkylli :

1. Balei phi ieit eh ia la ka ri ?

2. Iathuh kyrteng ia ki tiewdieng kiba don ha ri Khasi Jaintia.


LYNNONG IV.

JINGRWAI—KA RI KHASI JAINTIA.

1. Ri Khasi Ri Jaintia, kat phi ym ju don,
Dur lum, dur wah, dur riat, ha phi ba la shem.
Dei tang jingstad Blei, bym lah shuh ban
batai,
Ba ngi lah ban iohi kdar, kat shaba phai.

2. Ko lum Khasi Jaintia, kat phi ym ju don,
Ka lyer kaba pyngngad, tang ha phi ka don ;
Ki wah ruh kiba sngur, bad ki um kiba
shngiam,
Ban phet jngai na phi, mynsiem jong nga
ka iam.

LYNNONG V.
U TIROT SINGH.



pynryngkangpar	Khadsawphra	khlawait
riewshlur	jingpyniaid	Sylemlieb
nongpyniaid	thombor	Nongkhlaw

U Tirot Singh u long u Syiem ka Hima
Nongkhlaw, kaba don ha ri Khasi. Ka kmie
jong u ka kyrteng ka Ksan Syiemlieh.

U Tirot Singh u la bud khet ia u kñi jong u, u Konrai Syiem, haba u dang khadar snem ka rta ; u dang khynnah eh. Kumta u don hapoh ka jingpyniaid ki Myntri bad ka dorbar hima. Haba u la samla bha, u Tirot Singh u long u briew uba khiah krat uba khlaif, uba smat, uba proh jabieng de. U long ruh u nong-siat khnam uba tbit eh.

U long uba ieit eh ia la ka ri. La khot ia u u 'Khlawait'. U Tirot Singh u la lah long syiem lypa haba ka Sorkar Phareng ka la wan sha ka ri jong ngi.

Ngan iathuh katto katne ki kam kiba khraw ba u la leh ban pyni ia ka jinglong jong u.

Haba u Sahep Dabid Skot (Dabid Scott), uba ngi ki Khasi ngi ju khot u Iskad Sahep, uba long u nongsynshar ka Sorkar Phareng, u la wan ban plie ia ka surok na Kamrup sha Sylhet, ki nongpyniaid jingtrei ki la lehbeif bad thombor ia ki trai-ri. U Tirot Singh, namarkata. u la ialeh thma pyrshah ia ka Sorkar Phareng.

Ha ka thma kaba nyingkong u Tirot Singh bad la ki briew ki la pyniap arngut ki Rangbah Shipai Phareng. Uwei u kyrteng u Sahep Bedington, uwei pat u Sahep Burton, bad hynriewphew ngut ki shipai.

Ha ka thma kaba ar, U Tirot Singh u la ioh pyniap sa ia uwei u Rangbah Shipai uba kyrteng

u Sahep Bidon (Beaddon). U la thang ingkhong khait ia ka iingshong u Sahep Dabid Skot. La don ka jingjutor hapdeng ki briew u Tirot Singh hynrei um sngew ei ei, u khmihlynti ba un jop. Ka thma ka la neh haduh 4 snem.

Don bun ki jingjia hadien. U la phet rieh sha kawei ka krem maw, kaba haduh mynta ki khot ka 'Krem U Tirot'. U la mih nangta da ka jingmut kaba hok bad ba sngur ba un iasuk noh bad ka Sorkar hynrei la kem ia u Tirot Singh. La pynryngkangpar ia u bad la set phatok ia u sha Daka (Dacca). U Sahep Dabid Skot u la tyrwa ia u bunsien ba un iasuk, bad ba un leit pat sha la ka ri ban long biang u syiem hapoh ka jingpyniaid ka Sorkar. Hynrei U Tirot Singh um treh bad u ong, "Nga sngew-bha ban im kum u riewpaitbah ban ia kaba long u syiem mraw." Haba u don ha phatok ha Daka, bunsien na ki nar ker ka phatok u ju pyrta bad dawa ba dei ban don ka jingsynshar kaba bha ha ka hima jong u.

Hapoh phatok la ju tyrwa bunsien ba un shim biang ia la ka long syiem. U kyrngah la ka khlieh, u da kren skhem kumne : "Nga kham kiewkor kum u nongsah byndi hapoh phatok, ban ia ka jingim u syiem ha ka jing-khum ki kynjri".

U la iap ha Daka (Dacca) ha ka 29 tarik u 'Nai Lber (March) 1834, Don u mot ba la tei burom ha Mairang ban kynmaw ia u bad ia

ka Thma Khadsawphra. Ia une u mot la plie da u Lat (Governor) ha ka 29 tarik u 'Nai Lber 1954.


Ia ka nam, ka jingshlur bad jingieit ri jong u yn iaikynmaw bad iaipyrto katba ka ri jong ngi ka dang sah.

Jingkylli :

1. *U Tirot Singh u donnam balei ?*
2. *U la ialeh thma badno ?*
3. *Kael ka jingkwah jong u hapoh phatok ?*



LYNNONG VI.
U TIEW DOHMAW.



syndah prohjabienḡ mukmor jingpruid
syntiew pynsyriem sngem byrsaw

U tiew dohmaw u long u tiew khlaw uba
long ha syndah u maw, ha ki jaka sngem.

Phi ju iohi ia u tiew dohmaw ? Ka sla jong
u ka long kaba jlih kum ka mukmor. U don
bun ki jingpruid kiba rit bad ring kum ki ksai
kiba rit. Ka rong ka long kaba byrsaw ionḡ,
i syntiew pat iba lieh.

Haba rat na khlaw, ngi thung ha ka synduk. Ngi dei ban ai um bha. U long, u im; bha bad u phuh.

U tiew dohmaw u jyrngam baroh shisnem. La khot ia u tiew dohmaw laiphew-na-ar jingmut. La khot ia u kumta na kita ki jingpruid kiba don ha u. Peit bha ia ka dur jong u.

La pynsyriem ruh ia u briew uba heh khlieh, heh jabieng, uba ngi lah ruh ban khot u proh jabieng, kata, ia u briew uba stad.

Phi kwah ne em ban long kum u tiew dohmaw laiphew-na-ar jingmut ?

Jingkylli :

1. *Ia u briew uba kumno la pynsyriem bad u tiew dohmaw laiphew-na-ar jingmut ?*

2. *Ha ka por ai u ju mih bad u ju iap ?*

3. *Ka sla jong u ka long kaba kumno ?*



LYNNONG VII.


U NGAP.

ngap

khlaw

Jaipdeh

thliew



khñiang

kjit

syntiew

dieng

Phi la ju iohi ia u ngap ? U pah kumno ?

U ngap u dei u khñiang uba rit. La ri ia u ha ka ksing ba la thaw da ka dieng.

U ngap u shong hapoh khlaw, hapoh krem, hapoh thliew dieng bad ha syndah u maw de.

Don lai jait ki ngap hapoh ka ksing—ka kiaw, u ngaptem bad u ngaptung.

Ka kiaw ka long ka kmie kaba kha da ki hajar ki khun ngap shisngi shisngi.

U ngaptem u dei u ngap trei, u ngap kamai.
Naduh dang step haduh ban da miet u trei
minot eh.

Dang step u mih sha kper ting, bad u kjit
ia ki um ba thiang na u syntiew bad u wan rong
sha la iing.

U ngaptung u long u ngap jaipdeh. U shu
shong, u shu ap ja na kiwei. U pah jam pat
kum uba smat eh.

Ki ngap ki lum jingbam kumne ba kin bam
bad im ia lade.

Ngi ruh ngi ioh bam ngap na ka jingtrei
minot jong ki.

Jingkylli :

1. *Don katno jait ki ngap ?*
 2. *Mano ba kha ia ki khun ngap ?*
 3. *Ki khotkyrteng aiu ia u ngap jaipdeh ?*
-

LYNNONG VIII.

JINGRWAI—SHAPHANG U NGAP.



1. Wong ! wong ! phi pah ko ngap,
Sit ! sit ! phi kjit umngap ;
Phi rong ki um ba thiang,
Ter ter phi iakit lang.
2. Phi her marwei marwei,
Phim tieng la iaid marwei,
Phim ju thait phim ju ud,
Trei bad la ka kynud.
3. Ngap ba rit, khñiang ba ieit,
Phi hikai ban ia ieit ;
Hikai de ban trei smat,
Miet bad sngi, phim ju thait.

LYNNONG IX.

KA LAMA KA RI INDIA.

Nailar**shalyntem****jinglailtuid****jingshisha****jingiatylli****rongstem****rongjyrngam****ronglieh****lenlade****jingshlur**

Ha ki ri baroh jong ka pyrthei, ki don la
ki jong ki jong ki Lama.

Peit ia kane ka Lama ka Ri India.

Ka Ri India ka la ioh ia ka jinglailtuid ha
ka 15 tarik u 'Nailar 1947.

Ha ka lama ka Ri India, ki don lai jait ki
rong. Ka don ruh ka shalyntem hapdeng. Kine
ki rong bad ka shalyntem ki don ki jingmut kiba
angewtynnad sat.

- (1) Ka Rongstem—Ka mut ka jinglenlade,
bad ka jingaiti lut.
- (2) Ka Ronglieh—Ka mut ka jingsuk bad
ka jingshisha.
- (3) Ka Rongjyrngam—Ka mut ka hok bad
ka jingshlur.

(4) **Ka Shalyntem pat—Ka mut ka jingiatylli lang kawei ha ka jingiatreilang bad barit bad bakhraw. Ka lama ka Ri India ka pyni shai ba ka Ri India ka kwah ba ka ri baroh kawei kan long kumba ka lama ka la pyni ia ka dak jong ka.**

Jingkylli :

1. *Katno rong ki don ha ka lama ka Ri India?*
 2. *Iathuh kyrteng ia ki. Kaei ka jingmut jong ki ?*
 3. *Ka shalyntem ka pyni ia ei ?*
-

LYNNONG X.

U JAWAHARLAL NEHRU.

riewstad

thombor

jinglakhih

rangbah

pyrshah



Allahabad

nongialam

riewspah

Motilal

skulbah

U Nehru u long u khun rangbah ba marwei jong u kpa jong u, u Motilal Nehru. U kpa jong u u long uba khraw batri na ka jait

Brahmin. U long ruh uba riewspah shibun. U kpa jong u Nehru u long uwei na ki riewstad aiñ jong ka Ri India.

La kha ia u Nehru ha ka 14 tarik u 'Naiwieng (November) ha ka 1889 ha Allahabad.

Haba u Nehru u la dap 16 snem ka rta, u kpa jong u u la phah shongskul sha ri Bilat sha ki artylli ki skulbah.

U Nehru ynda u la wan phai na Bilat, u la iashem bad u Mahatma Gandhi bad kumta ki la iakhih pyrshah ia ka Sorkar Phareng. Kawei pat, u la long u nongialam ba rangbah ha kaba ialeh pyrshah ia ka jingbanbein bad thombor ka Sorkar ia ki nongrep kiba don ha ka Ri India kaba shaphang shatei. La ki trei katno katno kim ioh jingmyntoi ei ei. Ha kane ka jingiarap jong u, baroh ki la shaniah, ki la ieit bad burom ia u.

U Nehru u la shah shitom shibun eh. U la shah set phatok bunsien na ka bynta la ka ri.

U Nehru u long u lok ba ieit u Mahatma Gandhi. Da ka jingialeh shitom jong ki, Ka Ri India ka la ioh ia la ka Jinglailtuid kumba ka la long mynta.

U Nehru u la long u Myntri Rangbah (Prime Minister) uba nyngkong eh ka Ri India. Kum u myntri rangbah u la synshar da ka jingieit bad jingstad. U kwah eh ia ka jingsuk bad ym ban ialeh thma.

U la leit sha ki ri kylleng ka pyrtnei ban wallam ia ka jingsuk ha la ka ri. U la wan jngoh ia ki Ri Lum jong ngi bad u la wan poi haduh Sohra.

U Nehru u ieit eh ia la ka ri. U ieit ia kiba duk bad u ieit khamtam eh ia ki khynnah. La khot ia u u 'Ma Ma' ki khynnah.

Na ka bynta kane ka jingshisha, ia ka sngi-kha jong u Nehru, 14 tarik u 'Naiwieng, la khot ka 'Sngi jong ki khynnah' (Children's Day). Ha kane ka sngi ki khynnah skul baroh ha ka ri ki ioh shuti, ki ioh ban ialehkai bad iadih sha sngewbha bad ki ioh prais de. Ki khynnah baroh ki dei ban kynmaw ieit bad burom ia une u Myntri Rangbah ka ri.

U la iap ha ka 27 tarik u 'Nai Jymmang (May) 1964. Ka ri baroh kawei ka la dap da ka jingsngewsih bad jingdum da kane ka jingkhlad noh jong u. Ka pyrtnei hi baroh kawei ka la pyni ia ka jingduh kaba khraw da ka jingiap jong u. La thung Myntri Rangbah hadien jong u da u Lal Bahadur Shastri.

Jingkylli :

1. U Nehru namar ba u ieit eh ia la ka ri u la shah shitom kumno ?
 2. Katno tylli ki skulbah u la leit pule ?
 3. Balei la khot ia u u 'Ma Ma' ki khynnah ?
 4. Kumno ka ri ka sngew da ka jingiap jong u ?
-

LYNNONG XI.

KA SAROJINI NAIDU.

nengthaw

Hyderabad

sngewieit

jingstad

Aphrika



pynshlur

phyrnai

jinglailuid

bunsien

riewspah

Ka Sarojini Naidu ka long kawei na ki khun khynthei ba pawnam jong ka Ri India, kiba ki kam jong ka ki phyrnai kum ka sngi.

Ka Sarojini Naidu ka la mih na ka iing Brahmin kaba bha. U kpa jong ka u long u riwstad uba la leit pule sha ki skulbah ka ri sepngi. U la ioh ia ka nam Doktor ka Jingstad Saians. Kumta ka Sarojini ka la mih na ka iing kaba nang ba stad, bad kaba riwspah de.

La kha ia ka ha Hyderabad ha ka 13 tarik u 'Nai Rymphang (February) 1879.

Ka Sarojini Naidu ka la leit shongskul sha ri Bilat ha ki artylli ki skulbah. Ka la ioh ka nam na kane ka skulbah kum ka kynthei kaba stad.

Nalor ba ka don ka jingnang jingstad kaba khraw, ka ieit eh ia ki jingrwai. Ka long ka nongthaw jingrwai kaba stad. Ka la thaw bun ki jingrwai ba bang naduh ba ka dang khynnah rit.

Nalor kine, ka la trei bun ki kam kiba khraw na ka bynta la ka ri. Ka long ruh ka kynthei kaba shlur bad kaba ieit ri kum u Mahatma Gandhi bad u Nehru. Ka la trei shitom ha ki bun jait ki kam na ka bynta la ka ri.

Kawei ka kam kaba pynpaw ia ka jingshlur jong ka ka long ba ka la ialeh pyrshah ia ka Sorkar Phareng, ba ka ri kan ioh la ka hok bad ka jinglailuid. Ka la shah shitom ruh bunsien. Kawei pat, ka la leit khnang shaduh ri Bilat ba kan tip ia ka jingiadei ba shisha bad la ka ri. Ynda ka la wan phai ka la pynbna paidbah ia ka jingleh bymdei bad thombor jong ka Sorkar Phareng. Ka Sorkar ka la bitar shibun. Ka la pynbor ia ka ba kan pan map. Ka Sarojini kam treh.

Ka la trei bun ki kam ban pynsuk ia la ka ri. Ka la trei hapdeng ki kynthei ba kin sngewthuh bad ban pynshlur ia ki ba kin ioh ha la ki ling ia ka jinglailuid bad jingstad.

Ka la leit shaduh Aphrika ban iarap ia la ki para nong-India ba la shah banbeifi ha ka Sorkar Phareng, haduh ba ki briew baroh hangta ki ieit eh ia ka. Ki ong, "To shong to sah noh bad ngi."

Ka Sarojini Naidu ka la long ka Lat (Governor) kynthei kaba nyngkong eh ha Ri India.


Ka la iap ha ka 2 tarik u 'Nai Lber (March) 1948. La iam briew bad pyrto ia ka da ki briew baroh. Ki ong, "Ngim shem shuh ka kynthei kum ka Sarojini Naidu."

Jingkylli :

1. *Nalor ki kam baroh, ka Sarojini ka ieit eh iaei ?*
2. *Katto tylli ki skul ba ka leit pule ?*
3. *Ha ka kam aiu ba ka la long nyngkong ?*


LYNNONG XII.

KA JINGRWAI—KA RI INDIA.



1. Ri India baieit jong ngi,
Ba la kha ki khun phrang sngi ;
Kynthei, shynrang, mih ter-shi-ter
Jingiwbih nam jong ki ka her.
 2. Ri India baieit jong ngi,
Hajar briew ki peit sha phi ;
Ka ri ka spah, ka ri ba phylla,
Jinglong jong pha iaisah shirta.
-

LYNNONG XIII.

KI KYRDAN SHA KA JINGNANG
JINGSTAD.**jingstad****jingkohnguh****jingminot****jingwantista****jingshahshkor****kyrdan**

Ka jingstad ka pyrta jam mynta ki por.
 Ban ioh la ka bam dei ban da trei. Ban ioh soh
 dei ban thung brisoh. Ban ioh khaw ban shet-
 ja, dei ban rep kba. Ban poi sha ka kyrdan
 kaba biang jong ka jingnang jingstad, dei ban
 ialeh tynggeh.

Don saw tylli ki mawkyrdan kiba kongsan
ia u khynnah skul sha ka jingstad :—

1. Ka Jingkohnguh—ka long u mawkyrdan
uba nyngkong sha ka jingstad.

2. Ka Jingminot—ka long u mawkyrdan
uba ar sha ka jingstad.

3. Ka Jingshahshkor—ka long u mawkyrdan
uba lai sha ka jingstad.

4. Ea Jingwantista—ka long u mawkyrdan
uba saw sha ka jingstad.

Ki khynnah skul baroh ki dei ban ialeh
tynggeh ban kiew ia kine ki mawkyrdan, ban
long kiba nang ba stad.

Jingkylli :

1. *Kiei ki sawtylli ki mawkyrdan sha ka
jingnang jingstad ?*

2. *Phi don ne em ha uwei na kine ?*

LYNNONG XIV.

KI KYRDAN SHA KA JINGSTAD.



1. Hei ! Ko hep ialeh ban kiew,
Mawkyrdan sha ka jingstad ;
La ka eh, kyllon, khie, kiew,
Kiba mon, don bun ki lad.
 2. Jingkohnguh bad jingminot,
Ynda jop long kum u mot :
Jingshahshkor bad jingtista,
Kiba mon, to leh kumta.
 3. Shaphrang, shaphrang, to nang kiew,
Katba jop, ki nang kyntiew ;
Jingnang jingstad pyrta jam,
Dei ka jingstad kaba tam.
-

LYNNONG XV.

U PHAN.

Nyngkong


nyngshap

ñlut

Khasi

dpei

khyndew



jingmyntoi

jingthung

Nongkhlaw

U phan u long u jingthung uba ngi tip baroh. U long u jingthung ba la rep ha ka ri jong ngi.

Ia u phan la wallam symbai nyngkong nyngshap sha ka ri jong ngi da u Sahep Dabid Skot (David Scott) ha ka por u Tirot Singh u Syiem Nongkhlaw.

U phan u don bun jait—u phan syntiew, u phan jatira, u phan saw bad kiwei kiwei.

Ki ju thung phan arsien shisnem. U shong hapoh khyndew saw bnai, bad ki sa rat. Ki thung phan bad u dpei, uba ki khot u 'bun', ba la ioh na ki niut bad ki dieng ba la thang. Ki sa khleh de bad ki sboh eitmasi, eitblang, eit-sniang.

Hapdeng ki ri lum jong ka ri, don ki jaka ba u da met bha bad roi. U lah ban mih na ka shimon haduh shiphew mon, kata ha ka jaka ba u iadei bha.

Ki thung phan da u phan uba ki la ri bad sumar bha ban long u phan symbai.

U phan u long u jingthung uba ai jingmyntoi shibun eh. U long ka spah bah spah san. U phan u long ruh u mar khaïi uba iaïd bha naduh hyndai hynthai haduh mynta. U phan u dei u jingbam uba ngi bam bha baroh. La kit ia u shaduh ki ri kylleng ka pyrthei.

To rep phan baroh ban ioh bam, ban ioh pisa bad ban ioh symbai de.

Jingkylli :

1. *Mano ba la wan rah symbai phan nyng-kong sha ka ri jong ngi ?*

2. *Ki briew ki thung phan kumno ?*

3. *Ki briew ki ioh jingmyntoi aïu na u phan ?*

LYNNONG XVI.

JINGPULE—KI JINGRIEW BA IAPHER.



U slap u hap prop prop.

Ka um ka jaw jrop jrop.

Ka kshaid ka sawa shaid shaid.

Ka tin ka riew tar tar haba shoh.

Ka snieh ka riew mep mep haba shoh.

U maw u riew tuk tuk haba tangon.

Ka pleit ka riew shriaw shriaw haba pynpait.

Ka shakuriaw ka riew shaw shaw haba kynruh.



Ka baje ka riew teng teng haba tied.

Ka ding ka rwai ur ur haba ka meh.

I baje i rwai tik tik haba i iaid.

Ka motor ka pah pud pud.

U jumai u khynñiuh ñiak ñiak.

Baroh ki don la ki jingsawa ne jingriew.
Ngin iohsngew haba ngi sngap bha ia ki.


LYNNONG XVII.

KA SNGI.

pynsyaid

sngewphylla

pynshai



nangtai

khriat

thait

Khun—Ko Mei, kaei katei ?*Kmie*—Ka dei ka sngi keiñ, khun.*Khun*—Mano ba buh hangtei ?*Kmie*—U Blei keiñ, khun.*Khun*—Ka leh aiu hangtei ?

Kmie—Ka mih nangtai na mihngi ban ai jingshai ia ngi ki briew, bad ki mrad, bad ia kiei kiei baroh kiba don ha ka pyrthei.

Khun—Ka shongsah hangtai, Mei ?

Kmie—Em, khun. Katba ka por ka nangiaid, ka sngi ruh ka nangiaid, ka nangkiew nangkiew, bad kumta ka mih na mihngi, ka leit shaduh sepngi.

Khun—Ka leit thiah sha sepngi kumba ngi ruh ngi leit thiah ?

Kmie—Em, khun. Ka sngi kam ju thiah. Ka ai jingshai shaid shi shaid. Ka phai na mihngi, ka leit ai jingshai pat sha kiwei ki ri. Haba dum sha ngi, ngi thiah ; haba phai pat sha ngi, kiwei ki ri ki thiah.

Khun—Wa ! kaba sngewphylla sat mo, Mei ?

Kmie—Hooïd, khun. U Blei Uba thaw ia ngi U long Uba stad shisha. U leh ma U kumta ba ngin iaïoh jingshai, jingsyaid baroh shi pyrthei.

Khun—Haba ngi dang rit, haba ngi ialeit sum sha wah haba dum ka sngi, ngi khriat. Kumta ngi ju iapyrta, “Thang thang ko Mei Ngi, ban syaid ki khun bynriew.”

Ka sngi ka ai jingshai, jingsyaid, jingim ia u briew, u mrad bad ki jingthung jingtep baroh. Khlem ka sngi baroh ngin iap lut.

Jingkylli :

1. *Ka sngi ka mih naei ?*
 2. *Ka sngi ka sep shaei ?*
 3. *Khlem ka sngi, ngin long kumno ?*
 4. *Ka sngi ka ai aiu ia ngi ?*
-

LYNNONG XVIII.


U HATI.

tian

rben

pyndonkam

phir-phir



kdiah

kyrdep

sngowphylla

Jingsngowthuh

U.hati u long u mrad uba heh bad uba
khlaiñ tam na ki mrad baroh. Ka dur ka dar
ruh kaba iapher na kiwei kiwei ki mrad.

U hati u shong bad u juh ha ki lawbah
lawsan. U don ha ki khlaw kiba rben ha ri
Bhoi ha ri Khasi bad ha khlaw Narpuh ha ri
Jaintia. Um ju shong ha ki khlaw kiba rit
jong ka ri.

Phi la ju iohi ia u hati ? Peit bha ia ka
dur jong u namar ngim kham iohi ba un wan
poi sha ka ri jong ngi. Peit ia ka met, ki kti,
ki kjat kiba heh kum u dieng sawdong. Ka
snieh jong u ruh ka long kaba rben bha. U
da pher shisha nadong shadong na kiwei pat
ki mrad.

Peit ki shkor kiba heh kyrdep, ki heh kat
ka trap rit. Peit ka khmut kaba iphylla bad

jrong sat. Ia ka khmut jong u la khot u 'luta.' Da une u luta u pyndonkam kum ki kti, kumba pyndonkam ma ngi ki briew. U tian ja, u dih um, u tong um—u shu kjit bad u pyndap ha ki pipa kiba heh. U kdiah ia ki diengbah diengsan; u shim da u luta ia ki mar bad u buh halor ka met ban kit. U lah ban khar wat ia i pisa iba rit na khyndew.

U hati u don artylli ki bniat kiba jrong bad kiba lieh phir phir. Kine ki long kiba kordor bad kiba rem bad shongdor da ki spah tyngka ban thied.

U hati u sumar bha ia la ka jingim na ka bynta la ki bniat. Ia u hati uba heh duh ki khot u 'hati saw kuna'. Une u long uba dom shibun. Ki briew ki sheptieng eh ia u.

U hati la u long u mrad uba heh bad itieng, u long uba sngewthuh. Lah ban ri bad pynjuh ia u da ki briew. U long uba lah ban pyndonkam.

Ia u hati nalor ba ki pyndonkam ban kdiah ia ki diengbah diengsan, bad ban kit ia ki, la pyndonkam ruh ban shong kum u kulai. Ki Syiem Khasi Jaintia bad ki Syiem kiba khraw ka Ri India ki fiiewkor bad ki ju shong halor jong u ban leitkai sngewbha. La siang da ki jaiñ ba kordor ban pynlong kum ka jin kulai.

Ia u nongñiah hati la khot u 'Mahut'. U hati u ieit eh ia une bad kohnguh ia u katba u hukum.

Ki briew kiba kwah ban ioh hati ki leit riam ne kem ia u. Ki leit bun briew, ki da rah bad ki suloi bad ki sum.

U hati u long u mrad uba heh tam na ki mrad baroh ba U Blei U la thaw.

Jingkylli :

1. *Ia ka khmut u hati la khot uei ?*
 2. *U leh aiu da une u luta ?*
 3. *Ia u hati uba heh bad runar eh ki khot uei ?*
 4. *Ngi ioh jingmyntoi aiu na u hati ?*
-

LYNNONG XIX.

KA SHATRI.



shatri	Jaiñjri	salia	khylliap
pyndait	plied	sainar	pynskhem

Peit ! Kane ka shatri, phi ju pyndonkam
ia ka ?

Ia ka shatri la shna khnang ba kan iada
na ka sngi bad u slap. Ka long kaba sting
bad ngi rah ia ka ha la ka kti.

Ka shatri ka don bun rukom. Ka don kaba
don phra tylli ne khadar tylli ne khadhynriew
tylli ki nar. Kine ki nar ki long kum ki shyieng

krung, ba la pyndait bad ba la pynskhem da u sainar, ba lah ruh ban plied bad ban khylliap ia ka.

La sop halor kata ka shynrong da ka jaiñ. Ki shatri ki don bun rong, kaba lieh, kaba iong, kaba saw bad kiwei kiwei. Don ki shatri ba la suh da ki jaiñ ba bun rong. Ki itynnad eh haba kup ki khyannah.

Ka shatri kaba la shna nyngkong eh ka dei na ri China. Ia kine la shna da u shken bad la sop da ka sla ha ka jaka ka jaiñ. La shna tang ban da sngi bad kam da long kaba bha. Ki shatri kiba kham bha bad itynnad ki dei na ri Burma. Hadien kane pat na ri Bilat. La shna da ki jaiñ. Ki dur ki long kiba itynnad bad ki jingbat kiba itynnad har rukom. Mynta pat ha ri India bad kylleng ki ri ki la nang ban shna shatri.

Ka shatri ka long kawei na ki mar khafi kiba ioh pisa. Ka shatri ka long kaba donkam eh ha ki ri shit bad ha ki jaka kiba hap slap. Haba ngi sngewkhia eh ban rah da ka knup ka trap, ne haba ngi salia ban rah jaiñjri, ngi rah noh da ka shatri namar ka sting bad suk ban rah. Ka shatri ka long kaba donkam bad kordor ia u briew.

Jingkylli :

1. Na kano ka ri la shna shatri nyngkong eh ?
2. Ka shatri ka iada naei ?

MEGHALAYA STATE CENTRAL

LYNNONG XX.

JINGRWAI—KIEI KIEI KIBA RIT.




jngum
 phylla
 shyiap
 jingwiat
 jingleit
 symboh
 samrkhie
 phylliah

1. Iwei i jingjaw ba rit jong ka um,
 I pyndap ia ka duriaw ba iong jngum ;
 Iwei i symboh ba rit u shyiap,
 Ka madan ba jlan bah i iai pyndap
2. Iwei i ktien ba rit jong ka jingieit,
 Iwei i kam ba rit jong ka jingsbun,
 Iwei i jingwiat samrkhie ba phi peit
 Pynjem ka dohnud ba eh kiba bun.

3. Kumta iwei i jingbakla ba rit,
 Kumjuh, kawei ka ktien shukor ba rit
 Ki lah eh ban long kum i phylliahding
 Ban pynjot lut bad thang ha ban da ing.

LYNNONG XXI.

U DEWIONG.



dewiong

syaid

Laitryngew

pyniaid

atoskhana

Shillong

U dewiong u don ha ki bun ki jaka ha kane
 ka ri jong ngi. Ngi tip baroh ba u don ha Sohra
 bad nangne la pynmih shibun u dewiong. Ha
 u lum Lawbah ha Sohra bad ha Laitryngew bad
 kiwei kiwei ki jaka ha Ri Khasi Jaintia don bun
 ki par dewiong.

Phi la ju iohi ia ki par dewiong ? La tih
 ia u dewiong na ki par. Don ki par ba la tap
 da u mawsiang, don pat ki par ba la shu krang
 ia ka khyndew bad sa tih ia u.

Ki par dewiong ki long kiba dum. Haba-
rung shapoh ki tbeh da ki sharak rit bad ki sa-
tih da ki tiar. Ka kam tih dewiong ka long kawei
na ki lad kiba pynim ja ia ki briew. Bun na
kylleng ki jaka ki wan tih dewiong bad wan
kit de ia u.

U dewiong u long ka spah bah spah san.
Ki briew kiba don la ki par dewiong la jong lei
lei ki ioh pisa bha.

U dewiong u long uba donkam shibun. Ia.
u dewiong ngi thang ha atoskhana ban syaid
ding bad shet jingshet de. Da u dewiong ki
thang shun. Na u dewiong ki sain bad ioh ia
ka rong iong. Da u dewiong ki pyniaid ia ki
kor ki bor ban trei jingtrei, bad la pyniaid ia
ki rel bad ki jhad de.

Ia u dewiong la kit da ki motor sha Shillong,
nangta pat ki kit sha kylleng ki jaka.


U dewiong u long u mar khañi uba myntoi
eh ha ka ri jong ngi.

Jingkylli :

1. *Naei la tih ia u dewiong ?*
 2. *Ia u dewiong la pyndonkam haei ?*
 3. *Nangno la shem kynrei ia u dewiong ?*
-

LYNNONG XXII.

KA EROPLEIÑ



eroplaiñ	liengsuiñ	thapniang
pynjan	jingsawa	umphniang
jingjrong	shikynta	jingkhai

Ka eroplaiñ ka long ka liengsuiñ. La jan man ka sngi ngi iohi ba ka her ha suiñ kum ka sim kaba heh. Ngi sngewthuh ia ka na ka jingsawa jong ka.

Bun ki briew kiba stad jong ki ri Sepngi ki la pyrshang ban shna ia ka, hynrei kiba la lah nyngkong eh ban pyniaid ia ka ki dei ki arngut shipara na ri Amerika, ha ka snem 1903.

Ia ka eroplaiñ la thaw shibynta na ka dieng bad shibynta na ka nar. Ki don bun ki kor ki bor ha ka, bad la pyniaid ia ka da ka umphniang petrol.

Don bun jait ki eroplaiñ. Don kiba don tang kawei ka enjin, don pat kiba don artylli

ki enjin. Don kiba don shijur ki thapniang, don pat kiba don arjur ki thapniang.

Ha ki thapniang ki buh petrol bad ka enjin ka don hajan jong ki.

Kaba phylla ka long ba ym tang ba ki her ha suiñ, hynrei ki lah ruh ban hiar bad per ha sla um.


Don bun ki rangbah kiba trei hapoh ka eropleiñ. Don ruh ki nongsumar, ki nongaibam jingbam ia ki nongleit jingleit da u rangbah ne kynthei.

Ka jingmyntoi ba ka eropleiñ ka ai ka long ba ka pynjan ia kawei ka dong ka pyrthei sha kawei pat, namar ka lah ban her da ki spah mail shikynta. Ka kit ia ki shithi na ki ri kiba jngai. Ka kit ia ki tiar iapom ha ki por thma. Ka kit ia ki tiar ki tar bad ki mar khali.

Ha ki por ba jia ka nemsniew ne ka jing. iapthngan, bym ioh jingbam naei naei, la pynkit jingbam da ka eropleiñ ba ki briew kin ym iapthngan. Ka la kit shisien ia u soh na ka ri jong ngi na Shella, ba ym pat don surok ba lah ban kit da ki motor. Phin sa ioh jingtip shuh shuh shaphang ka eropleiñ ha ki klass kiba shaneng.

LYNNONG XXIII.

KA KRAMAPHON.

**kramaphon****rekord****Thomas Edison****radio****pleit****sound boks**

Ka kramaphon ka long ka kor kaba kren.
La shem nyngkong da u Thomas Edison, u
nong Amerika.

Haba ka dang mih nyngkong, ka long shisha
kaba phylla, haba iohsngew ba ka kren ne rwai.
Sngew kumba don u briew ne ka briew kaba
da kren shisha. Mynta pat naduh ba la mih
ka radio, ym da sngewphylla shuh.

Ka kramaphon ka long syiem kum ka
synduk. Hapoh synduk don ki kor ki bor.
Habar pat don ka pliang kaba ki khot ka rekord.
Ia kane ka pliang la thaw na ka kynja laha.
Don ki snur kum ki ksai kiba rit ha ka.

Nangta pat don sa uwei u tiar pynmih jingsawa uba ki khot u 'sound boks'. Ha une ki pyndait pin. Ka sa riew ka jingsawa kaba kren ne rwai.

Phi la ju iohsngew ia ka kramaphon ? Katno ka jingsngewtynnad haba ka rwai, ka put, ka tem ne ka kren ! Bun ki briew ki shait tem kramaphon haba don kano kano ka jingsngewbha kum ka jingshongkurim ne kiwei kiwei.

Haba ki briew ki thait, ki sngewkynjah ki pyntem da ka kramaphon bad ki sngewjahthait bad sngewshngaiñ shibun.

Ka kramaphon ka pyniohsngew ia ngi ia ki ktien, ki jingkren, ki jingrwai jong ki briew kiba khraw haba ki kren na shajngai. Tang da kaba sngap ia ka, ngi la nang ban kren khala khala ia ki ktien bad ki sur jong ka. Wat naduh ki khynnah kiba rit ruh ki shem ia kane.

Kaba sngewtynnad eh lada ngi don kramaphon ha la iing.

Jingkylli :

1. *Mano ba la shem ia ka Kramaphon ?*
 2. *Ka dur jong ka ka long kaba kumno ?*
 3. *Kiei ki jingmyntoi ba ngi ioh na ka Kramaphon ?*
-

LYNNONG XXIV.

KA KSHOID WAH REN.

kshaid	Umñiuh	thwei	Wei Kyian
snier	Shynliar	lyiur	khawolt
paitbah	iehnoh	ithiang	pyngngad

Ka Kshaid Wah Ren ka don hapdeng ka Nongjri bad ka Umñiuh. Ka long ka jaka kaba ithiang ha Ri Khasi, tangba ka don sha kyndong eh. Bun ki paitbah kim iohi ia ka. Lada unō uno u riewphylla un iohi ia ka, um lah khlem da shon dur ia ka.

Kane ka kshaid ka tuid na kawei ka thwei kaba heh kaba ki khot ka Wei Kyian.

Ka jingiathuhkhana pateng ka ong, hana, ba ka Ri Jaintia hyndai bah ka kut ka pud haduh kane ka jaka. Ki ong ruh ba u N'iang Raja, u Syiem Jaintia u ju leit sait la ki snier ha kane ka thwei.

Ka kshaid ka tuid na u mawsiang bah mawsiang san. Ka tuid patarsut sha ka jaka kaba ki khot ka 'Mawsiang Shynliar'. Ia kane ka kshaid la iohi lut na khap ri Dkhar ha ka por lyiur. Ka long ka jaka kaba ithiang than bad kaba pyngngad shibun.

Ka don ka khanatang shaphang kane ka kshaid. Ka ong ba u Ren, u khun kawei ka

'riewkynthei na Nongjri, u shait leit khwai dohkha borabor sha kane ka wah. Bun ki briew ki ialeit hynrei kim ju ngat dohkha. U Ren pat u ioh dap ruh man ka por.

Ha kawei ka sngi, kawei ka puri kaba bhabriew sat ka la wan iashem'ia u Ren. Ka la iakren sngewbha bad u, ka da ong, "Nga la pynngat dohkha ia phi namar ba nga ieit ia phi; namarkata to wan shong noh bad nga." U Ren pat u ong, "Em phi, wan sah ma phi. Ngam lah iehnoh ia i mei ba in sah marwei." Ynda kumta ki la iakut ba kan leit. Ka ong, "Tang ba phi dei ban da sar bad pynkhuid bha ia ka ling ka sem, namar ngam lah shong lah sah haba tngit".

Ka kmie u Ren ka la sar bad pynkhuid bha ia ka ling ka sem baroh. Ha ka sngi ba la ia buh, ka la wan. Naduh jngai ka kmie ka la iohi bad ka la ong, "Wa ! ka puri du !"

Ka puri tang shu rung, ka iohi ia u synsar ha lyndet jingkhong. Ka khawoit kti ia u Ren. U Ren u ieng bak, u ong, "Mei, ngan shu saham. Sngap bha, katba phi dang iohangew ia ka jingsaham jong nga, kata nga dang im."

Ki Nangjri ki ju iohsngew ha ka por lyiur ia ka jingsawa kane ka kshaid, "Ham, ham". Ki sa khot ia ka ka Kshaid Wah Ren haduh mynta.

LYNNONG XX.

JINGRWAI—TUR SHAPHRANG.



Pyneh hep, ban tur shaphrang,
 Khlem jingeh, ym don jingnang,
 Dei tang ban ialeh tyngeh,
 Ban jop lut ia ki jingeh ;
 Pyneh hep, ban tur shaphrang.

LYNNONG XXVI.

KUMNO BA KA MET KAN STING

(Ka Jingai Jingmut ia ki Nonghikai).

Donkam shibun eh ia ka jingryntih lang ki khynnah ha kiei kiei. Ka la dei eh ban buh ia ine i lynnong Physical Exercise ban iarap ia ka jingthait jingsalia ki khynnah bad ia id ryntih ha kino kino ki kam.

Lah ban pyndonkam ha kaba sdang ne pdeng ka Skul katba ibit u Nonghikai.

Yn pynkynmaw pat ia kaei kaba la leh ha ka Klass 'A', bad sa katto katne kiwei pat :—

- I. Ieng shrak (Fall in).
- Ieng shkait (Attention).
- Ieng sakar (Attend at ease).
- Phai wak sha kamon (Right about turn).
- Phai wak sha kadiang (Left about turn).
- Ieng shynriah kjat (Up, Lower).
- Ieng khongdong kjat (Up, Upper).
- Kyrdem kjat (Mark time).
- Kyrdem stet (Double mark time).
- Niew na kamon ne na kadiang (Number from the right or left).
- Peit pyrshah (Eyes front).
- Peit kamon (Eyes right).
- (Sa kham ia ki shynriah kti, sa pyniar katba lah).

II. 1. Sei ki kti shajrong (Hands forward stretch).

2. Rah ki kti shajrong (Hands upwards stretch).

3. Pynhiar ki kti (Hands down).

4. Rah ki kti shajrong, thap (Hands up, clap).

5. Pynhiar shapoh (Hands down).

(Ki Nonghikai ki lah ban pyndonkam ia ki ktien hukum (command) ha kane ka jinghikai).

Ia ka bynta kaba ar, ki lah ban nïew da ki number suki, hadien kham stet, lada ka long kaba lah ryngkat bad ki jingrwai de ha kine ki exercise. Lah ban ai shuh shuh katba mon u nonghikai nalar kine. Ki sports bad games ruh ki iarap ban pynsngewbha ia ki khynnah.

REFERENCE

Not to be Lent out

MEGHALAYA STATE CENTRAL
LIBRARY SHILLONG

Call No

Date,

Library books will give you Joy for Long;
Handle them gently with clean hands.



K. J. P. Press, Shillong
